



PLAID SIN VIA

Ussa essan nus amiez gl'atun, ils gis vegnan pli frestgs e pli cuorts, e l'emprema neiv sils aults ha svegliau il plascher dalla nova stagiun d'unviern. Las vaccas ein returnadas dall'alp e lur possessurs presentan ellas alla premiaziun pil tetel dalla miss Arena Alva. Aunc ussa san ins far las pli bialas turas da viandar e cul bike. Lein guder quellas avon che gl'unviern arriva. Gl'uost vargau havein nus astgau gratular a nossa convischina Maria Wymann per siu 100avel gi da naschientscha. Tgei grondius giubileum! Strusch da crer, da tgei eveniments che la seniore da nies vitg ei stada perdetga dil temps: ina Uiara mundiala, diversas crisas economicas e progress, l'introducziun dalla AVS ed il dretg da votar dallas dunnas. Era nossa regiun e nies cantun ha festivau gronds giubileums, numnadamein 600 onns coesiun ella Ligia Grischa e 500 onns Stadi liber dallas Treis Ligias. Ina liunga tradiziun dil sebrattar e dil s'anflar en cumpromiss. Nus astgein esser loschs, stuein denton era haver quita da quella. Aschia sco quei che nus premurein comunablamain per nies bi Laax. Che nossa vischnaunca resti schi multifara, cun spazi per grondas e pintgas caussas, sco ina teila tessida spess, cun fils fermes e stabils da turissem, commerci, survetschs, mistregn ed agricultura. In liug nua ch'ins sa viver, luvrar e serecrear dil meglier. En quei senn giavischel jeu a Vos in atun dad aur.

Franz Gschwend, president communal



Cun quei link vegnis Vu stier las Novas da Laax en tudestg e romontsch.

IMPRESSUM:

Novas da Laax, Gemeinde Laax
Erscheinung: alle 2 Monate zum Monatsende
Nächste Erscheinung: 29. November 2024
Themenideen: Bis zum 15. November 2024
Redaktion: Domenica Flütsch
Kontakt: admin@laax-gr.ch

TSCHUN DAMONDAS A FELIX RÖSEL, MENADER DALLA SCOLA DIL CONSORZI

Dapi igl 1 d'uost 2024 ei Felix Rösel (59), menader operativ dil Consorzi da scola Laax-Falera-Sagogn-Schluein.



Il meinascola Felix Rösel.

Bien gi signur Rösel. Astgein nus tschint-schar cun Vos romontsch?

Cul dialect tudestg grischun hai jeu negina breigia. Cul romontsch va ei aunc buca schi bein. Jeu sun denton vidlunder da frequentar in cuors online dalla Lia Rumantscha. E quei fa a mi in fetg grond plascher.

Vus essas buca in oriund Grischun, ni?

Mias ragischs grischunas hai jeu survegniu da mia mumma, lezza deriva da Sogn Murezi. Jeu mez sun carschius si en Tiartudestga, el cor sundel jeu denton adina staus in Grischun.

E co essas Vos «setschenta» a Laax?

Suenter ch'jeu hai menau 15 onns la Scuola svizra a Mexico haiel jeu giu il desideri da returnar. Aschia hai jeu entschiet ad encurir ina buna caschun per ina sfida el cantun Grischun. Spert hai jeu giu il sentiment che la scola da Laax ed jeu savessien s'accordar bein. Las persunas involucradas dalla direcziun e dalla cumissiun da scola paran da haver la medema capientscha d'in menaschi da scola.

Tgei ha plaschiu a Vos?

La mischeida d'innovaziun e genuinitad, e bia beinvulentscha, interess e respect. Cun genuinitad manegiel jeu il quita per l'instrucziun sco lavur centrala d'ina scola, cun persunas d'instrucziun motivadas, nua che scolaras e scolaras vegnan bugen a scola. Ins s'orientescha a novas enconuschientschas dalla pedagogia, senza ch'ins cuora suenter a mintga tendenza. Il Consorzi meina in svilup ponderau per sia scola, el ha ina fetg buna infrastruttura e grondiusas persunas d'instrucziun.

Tgei plai a Vos da nossa regiun?

Il standard da viver e la segirtad fan a mi aunc adina ina gronda impressiun. Mintga gi vegn jeu cun miu laptop segirs e senza disturbis al plaz da lavur. A Mexico era quei buca da s'immaginar. Ei plai a mi ch'jeu drovel buca in svegliarin pertgei a Schluein tucca ei mintga damaun da gis allas 5.30, quei fa endament ch'igl ei uras da levar. E sco amator dalla natira gaudel jeu la cuntrada spectaculara cun ir a viandar e spassegiar. Gia oz selegrel jeu d'in bi unviern cun bia neiv.

Engraziel fetg per quei discuors.



Il pur Wendelin Casutt durant il segar la garda.

LAG DIGL OBERST SUCCESS CUN MESIRAS DA TGIRA

Al Lag digl Oberst eis ei gartegiau cun success da tener anavos e reducir la garda che s'avonza el contuorn dil Lag digl Oberst. Igl ei in pass impurtont ella protecziun dalla paliu da muntada naziunala.


La paliu Lag digl Oberst ei in territori da muntada naziunala rar e precius. Igl ei il spazi da viver d'amfibis, utschals, insects ed era mammifers. Dapi onns pitescha quella cuntrada demai che la garda ha gronda forza e s'avonza pli e pli. Cun mesiras effectivas da tgira, sco per exempel segar duas gadas ad onn quella garda, han ins saviu scatschar considerablamein la

garda. «Quella avanzava pli e pli, malgrad quei eis ei gartegiau ils davos sis onns da reducir sia forza da crescer. Cun segar ha il tschespet suten survegniu glisch, quei che ha favurisau il svilup dils insects. Nus astgein constatar ch'il diember da specias ch'ei vid svanir diltut ein rinforzadas e cullas mesiras eis ei gartegiau d'interrumper il svilup negativ», ha Peter Weidmann,

architect da cuntrada e meinaproject dallas lavurs pil Lag digl Oberst. «Nus havein era plascher che nus havein saviu involver ellas mesiras da tgira dus acturs impurtonts, numnadamein il survetsch civil ed ils purs. Uonn vegnin nus a segar mo aunc ina gada ad onn, la fin d'uost, e nus sperein vinavon da tener sut controlla il carschen dalla garda», aschia Peter Weidmann.

«IN ALLEN VIER SPRACHKULTUREN ZU HAUSE»

Damaun sonda presenta la Fundaziun Pro Laax ina nova publicaziun che sefatschenta cun la veta da Pieder Tuor, naschius en l'Italia e carschius si a Laax.



Dapi varga tschien onns ei il «Tuor», quei cudisch verd che sefatschenta en detagl cul ZGB, il cudisch civil svizzer, lectura obligatoria per giuristas e giurists. Pieder Tuor (1876-1957),

igl autur dall'ovra da pionier da lezza gada, ei naschius en l'Italia e – suenter la mort dil bab – carschius si a Laax, la patria da sia mumma. El ha fatg carriera sco professor per dretg allas universitads da Friburg, Genevra e Berna. Da casa en tut las quatter culturas lingusticas dalla Svizra, ha el era cumbatiu

per la renconuschientscha dil romontsch. La biografia, rehamein illustrada, dat perdetga dil temps nua che Tuor ha agiu sco giurist ed intermediatur denter las culturas svizras.

Igl autur Pierre Felder, biadi da Pieder Tuor, ei staus docent per didactica d'historia, autur da cudischs da scola e menader dallas scolas popularas dil cantun Basilea-Marcu.

Cun contribuziuns dad Urs Altermatt, Theo Haas, Thomas Maissen, Peter Michael-Caflich, Georg Kreis, Patrik Kury, Rico Valär e Manfred Veraguth.

Interessentas ed interessents ein cordialmein envidai alla presentaziun dil cudisch che ha liug sonda, 28 da settember, 17.00, casa da scola Laax.

100 ONNS MARIA WYMAN, ILS 23 D'UOST 2024

Nus gratulein cordialmein a Maria Wyman sin siu centenari e giavischein ad ella era en quei liug tut il bien e cunzun la sanadad en sia aulta vegliadetga. El ravugl da sia famiglia, cun treis affons, in triep biadis e sutbiadis, ha la vescla dunna cun ragischs a Cuera astgau festivar siu grond gi.



CALENDER

Sonda, ils 28 da settember 2024

Presentaziun dil cudisch

«Da casa en tuttas culturas linguisticas»

Vendergis, 11 d'october 2024

Café nocturn el Museum Laax

Las localitads el Museum Laax ein gl'ambient ideal per seser da cumpignia denter mirs historics. Il medem mument eis ei ina caschun beinvegnida d'entupar hosps ed indigens.

Allas 18.00 – 24.00 Uhr, Museum Laax

Sonda, ils 12 d'october 2024

Miss Arena Alva e fiera d'atun 2024

Exposiziun da biestga, concurrenza da trer la suga dallas vischnauncas, folclora ed ina fiera da specialitads.

Allas 10.00 – 17.00, Rocks Resort Murschetg

Vendergis, 1 da november 2024

Rudi da cudischs

La squadra dalla Biblioteca Laax e lur lecturas e lecturs presentan en in ambient cumadeivel lur cudischs preferi.

Allas 18.30 – 20.00, Biblioteca Laax

Dumengia, 24 da november 2024

Referat «Svizra-China:

Opziuns ella relaziun culla China»

La scienziada da politica dr. Linda Maduz discuora davart la percepziun dalla China ell'Europa.

Allas 17.00, Cularta

Ils suentermiezgis da seniors dalla gievgia ein fixai sils suandonts termins:

10 e 24 d'october / 7 e 21 da november 2024.

«RUDI DA CUDISCHS»

Venderdis, igl 1. da november, 18.30–20.00, presenta il team dalla biblioteca ensemen cul lecturas e lecturs lur cudischs preferi! Haveis era Vus gust da presentar Vossa lectura preferida duront ca. 5 minutas en ina cumadeivla runda cun in bien glas vin? Lu s'annunziei tier: biblioteca.laax@kns.ch